

**Uunga siunnersuut: Kalaallit Nunaanni Inatsisartunut qinersisarneq pillugu Inatsisartut inatsisaata allanngortinneqarneranik Inatsisartut inatsisaat nr. xx, xx.xxxx 2018-imeersoq**

**(Partiit qinigassanngortitsisinnaatitaanerat, namminersorneq pillugu inatsimmi taaguutinut naleqqussaaneq, inatsisiliornerillu allanngornerisa malitsigisaannik iluarsinerit)**

(Inatsisartunut ilaasortaq Bentiarq Ottosen, Atassut)

### **Akissuteqaat**

Naalakkersuisut Siulittaasuat

### **Siullermeerneqarnera**

Aallaqqaasiullugu Inatsisartunut ilaasortaq Bentiarq Ottosen, Atassut, qinersisarneq pillugu inatsisip allanngortinneqarnera pillugu siunnersuummik saqqummiussineranik Naalakkersuisut sinnerlugit qutsavigaara.

Partii qinersinermi kingullermi ataatsimik arlalinnilluunniit qinigaatitaqarsimatillugu, qinersinissap nalunaarutigineqarnerani partiip Inatsisartuni ilaasortaatitaqarnissaanik qinersisunit atsiornernik katersaqaqaarnissamik piumasaqaateqartoqarunnaarsillugu qinersisarnermi inatsisip allanngortinnissaanik kissaateqarneq Naalakkersuisut assut nalilersortissallugu naleqqussoraat. Inuk imaluunniit inuit partii sinnerlugu qinigaasut kingorna partiimut allamut nuunnerisigut, Partii Inatsisartuni sinniisuutitaarussinnaavoq.

Qinersisarneq pillugu inatsimmut siunnersuummut inatsimmi atuuttumi oqaasertanut atorneqartunut aaqqiissutit siunnersuutit arlallit aamma ilaatinneqarput.

Qinersisarneq pillugu inatsit maanna atuuttoq 1996-imeersuuvoq. Kingorna qinersisarneq pillugu inatsimmut allannguutit pingasut akuerineqarput. Tamanna 1998-imi, 2012-mi 2018-milu pivoq. Qinersisarneq pillugu inatsimmi aalajangersakkat arlallit Naalakkersuisut isumaannik nutarsartariaqalersimapput..

Tamannalu tunuliaqutaralugu Naalakkersuisut qinersisarneq pillugu inatsisissamik nutaamik suliamik aallartitsipput. Kommunit qinersineq pillugu inatsisissamut kissaataasa piareersaasiornermi sapinngisamik siusinnerpaamik ilanngunneqareersikkumallugit, septembarimi kommunit ataatsimeeqatigineqarput.

Qinersisarneq pillugu inatsisip nutaap 2019-imi aasaanerani tamanut tusarniaassutiginnissaa, qinersisarnerlu pillugu inatsisissap 2020-mi upernaakkut Inatsisartunut saqqummiunneqarnissaa Naalakkersuisut siunertaraat.

Naalakkersuisut innersuussutigissavaat siunnersuuteqartup siunnersuutai ataasiakkaat Naalakkersuisut misissuinerminni ilanngullugit, minnerunngitsumillu partiimit partiimut nuuttoqartarnerani pissutsit ersarississallugit qanoq iliuuserineqarfigineqalissasut.

Qinersisarneq pillugu inatsisip tamakkiisumik nutarternissaanik suliaqarnerup aallarteernera pissutigalugu, Naalakkersuisut inatsisissatut siunnersuutip itigartitsissutigineqarnissaa innersuussutigaa.